

刻三原王公奏稿小敘

夫文章切實而有用者何蓋其耀采於精神之會握樞於事幾之始見孚於人心之同量任乎宇宙之大炳依乎日月之光凡此者皆其誠之著也天地以誠之理賦之人而有雜者皆僞也夫惟蓄養純全之理豐培高厚之基所見當自有別若三原王公恕者爲我

朝文章政事鉅公公受天地正氣得誠分數

爲多其平昔所以貫穿乎經史百家閒居
博觀乎民俗歷官而從事於職守當事而
克完乎終始皆非影響疑似之爲若手指
而目覩足履而口談者皆其誠篤之心所
著也故其文章之在奏草者其事則今世
之急務其經略則
先朝之斷案其辭則楚漢之簡古淺言之而
不俚深言之而不疎大言之而盡事之體
量直言之而受

聖皇之知遇始終成全公誠一代之偉人嗟乎
後學讀之想見其爲人喜播其微辭以傳
示永久得善本刻之揚州院治

嘉靖丁未中秋日

欽差巡按直隸監察御史華亭謝應徵書



王公奏稿序

春秋傳曰太上立德其次立功其次立言
雖久不廢蓋三者得其一皆足以傳於後
而不朽德盛矣功未必隆傳也功隆矣言
未必善傳也乃若言以紀德以昭功斯爲
至言傳也言必有德而後信於人功必待
言而後濟諸事則德猶爲言之本立言豈
易能哉況人臣進諫之道欲則攻之邪則
閉之不道則道之有犯而無欺言之立非

有道德爲之本烏能入之也古之人善諫
其君者臯陶邁種德謨陳而帝俞伊尹有
一德訓作而太甲順周公有聖德無逸立
政七月鴟鴞敘而成王悟言皆本之德傳
也功植於當時也繼是大聖如孔告定哀
公大賢如孟告惠宣大儒如程朱告哲宗
孝宗言不見用而不得行其道退而有六
經有七篇有易傳成書以明其道言一本
於德傳也功及於萬世也天啓

皇明豪傑輩作若今大司馬介菴先生王公以
關中儒者起家進士初入翰林爲庶吉士
尋以大理寺副歷守牧進御史中丞再進
兩京刑戶部侍郎至今官嘗一征湖湘三
出巡撫而今叅贊留都機務則再入也所
至秉古心迪古行守古典禮不詆于勢不
暴于寡弱威略足以平寇難廉貞足以激
貪墨仁惠足以蘇困窮公暇手不停披諸
經百氏書以意逆志有得輒書疑者辨訛

者訂前賢所未發者發體之身驗之家而推之以輔治天下蔚爲一代之望可謂有德者矣則其發於敢諫之言特緒餘耳蓋先生自委質以來遇事輒無隱矧十數年來四三刑人怙寵毒民無所不至中傷臺諫中外諱言先生於是以身任天下之重累抗論疏皆關

社稷至計蒼生嘉謨名教大經直指權奸而不忌力救正直而無阿婉而不迫直而不

譎頌而不諂真得臯陶伊周孔孟程朱告君之遺意者用能感悟

聖衷言無不聽計無不從以行其道以濟下時而下其膏澤也先生之言豈非紀德昭功而可傳者乎孔子曰有德者必有言先生有焉近者言事之臣以爲先生宜

密勿禁近備

顧問資啓沃疏進

上以留都根本重地叅贊節鎮重寄非先生不

可議乃寢此殆成王以周公留後治洛之意知遇何以加此先生雖極人臣之位能折節下士與講明道理故士之有志者咸樂及門而親炙之以珙迂昧不類辱啓牖良多而其子庠生承祥達而不羈承裕正而好古相得益厚承祥問以先生奏議凡若干卷見示捧而讀之而有感於春秋傳者之言遂僭爲敘而識其首簡若夫先生著述之可傳者尚多不獨此也

成化乙巳三月甲申

賜進士出身奉議大夫南京吏部文選郎中
浮梁程廷珙頓首序

王公奏稿目錄

第一卷

大理寺

申明律例奏狀

撫治荆襄

處置地方奏狀

查勘失機官員功罪奏狀

繳撫治流民 勅諭奏狀

陞左副都御史謝 恩奏狀

巡撫河南

區畫未完稅糧奏狀

蝗生境內請避位因勸 上去奢從儉

奏狀

激勸賢能奏狀

代書辦吏賈儀等請冠帶奏狀

言吏部不覆請給 誥命未當奏狀

陞南京刑部左侍郎謝 恩奏狀

第二卷

南京刑部

彗見地震乞休致奏狀

聞父喪復請給 誥命奏狀

蒙賜 誥命謝 恩奏狀

蒙賜葬祭謝 恩奏狀

總理河道

論報管河工程及乞禁馬快船附搭私

貨奏狀

言開河事宜并乞先修舊塘水閘奏狀

乞罷巡河管泉等項官員奏狀

言 詔令不可失信奏狀

言運船前進回淮揚修理河塘壩座奏
狀

言管河官應否添設奏狀

言裏河一帶災異奏狀

言山東得雨河道疏通奏狀

改南京戶部左侍郎謝 恩奏狀

南京戶部

處置運糧餘丁月糧奏狀

申明茶法奏狀

欲令兩淮山東長蘆三運司將鹽引紙
每張納鈔一貫奏狀

欲令公侯駙馬伯具印信文書關支祿
米奏狀

改左副都御史巡撫雲南謝 恩奏狀
欲帶男承祿隨侍奏狀

第三卷

巡撫雲南

處置邊務奏狀

奏解犯人及叅鎮守官奏狀

叅鎮守官跟隨人員擾害夷方奏狀

乞嚴賞罰以禁盜賊奏狀

陞右都御史謝 恩疏

乞却鎮守官 進貢禽鳥奏狀

論 駕帖不可無印信疏

叅提奪占南甸田地軍職奏狀

請 勅貴州會兵撫捕羅雄州賊人
狀

改南京都御史叅贊機務謝 恩疏

第四卷

前叅贊機務

回報守備太監黃賜到任奏狀

覆議定襄伯乞增操江官軍奏狀

南京長安右門外木廠內失火叅工部

官奏狀

太廟內樹木被風吹倒奏狀

覆奏南京六科陳言弭災事奏狀

駁議聽選官王瓚建言江北五衛免此

京操奏狀

關過 內府銅錢給賞日本國使臣事

畢奏狀

奏解詐僞犯人奏狀

叅奏南京經紀私與番使織造進絲紵

絲奏狀

乞存留騎操馬匹奏狀

第五卷

巡撫南直隸

地震請停任奏狀

議事奏狀

奏報災傷因言織造 進貢勞民傷財

奏狀

乞暫停燒輓奏狀

乞照舊令南京各衛官軍燒輓并要清

查沿江一帶蘆場奏狀

蒙賜 誥命謝 恩奏狀

乞休致奏狀

又乞休致奏狀

言應天等府糧草灾傷并成熟數目奏狀

乞休致奏狀

乞取回買玩好王太監奏狀

奉繳賑濟過軍民戶口文冊奏狀

陳言 聖學疏

乞休致奏狀

論中使擾人因乞休致奏疏

論中使科擾民所得物件奏狀

糾劾奸人撥置中使擾亂地方奏狀

申救常州府知府孫仁奏狀

陳言致治保邦奏狀

陳言治安奏狀

敷陳古訓奏狀

論錄事邵義傳奉 旨陞通判奏狀
京師地震自陳休致奏疏

第六卷

後叅贊機務

轉南京兵部尚書叅贊機務謝 恩疏
督修孝陵查筭工料數目奏狀
論撥船事宜奏狀
陳言山陝救荒奏狀
救林俊張黻奏狀

定奪修城營葬工料奏狀

同南京吏部等衙門應 詔陳言奏狀

乞休致奏狀

加陞太子少保謝 恩疏

督修 孝陵工完奏狀

將順 上意匡輔時政疏

孝陵工完受賞謝 恩疏

王公奏稿目錄終

王公奏稿卷之一

三原介菴王恕奏議

後學華亭謝應徵校正

大理寺

申明律例奏狀

臣備員棘寺叨司審錄常愧無分寸之補
奚敢有出位之思竊見法司中日逐擬斷
之事揆之律例雖無不合推之人情亦有
未宜今畧舉一二昧死妄言伏望

聖明少賜裁決著爲定例庶幾事得其宜而人
易遵守開坐具本謹題請

旨

一件祛除凶德事臣惟姦盜凶德也凡人有一於身人皆賤之耻與爲伍况
堂堂

清朝豈可容此之徒承襲世祿而玷辱

聖化乎切照軍職中間守分盡職者固多而爲
姦作盜者不少且姦與盜名雖不同

實則相等查得見行事例軍職犯縱
容及抑勒妻女與人通姦者俱照敗
倫傷化事例革職爲民許今應襲弟
男子姪替職其犯竊盜掏摸搶奪盜
官畜產者法司因無事例止照常例
發落仍令還職實是玷辱名爵有傷
風化如蒙

准言乞

勅該部同三法司計議除已發落外合無將今

後軍職有犯竊盜掏摸搶奪盜官畜
產者如律罪之亦照敗倫傷化事例
革職爲民許今應襲弟男子姪替職
如此則世祿及忠良之士在官無凶
德之人矣

一件抑勒爲娼事伏覩

大明律內一款抑勒妻妾及乞養女與人通姦
者本夫義父各杖一百姦夫杖八十婦女不
坐並離異歸宗其抑勒子孫之婦與人通姦

者罪亦如之欽此切照有等無廉耻之徒抑
勒妻妾及乞養女并子孫之婦與人
通姦討錢使用其妻妾及乞養女并
子孫之婦堅執不從被其逼打不過
纔方將情具告法司因見不曾成姦
止問不應杖罪仍令婦人隨住切詳
此等婦女思係良家不肯從伊爲娼
志節貞潔誠爲可嘉今旣具告到官
意在脫免污辱若謂未曾成姦仍令

隨住彼必得志仍前抑勒稍有不從
輒加捶楚以此婦女剛強不屈者必
至死地柔善軟弱者終被污辱實是
敗壞人倫有傷風化如蒙

准言乞

勅三法司計議合無將今後但係抑勒妻妾及
乞養女并子孫之婦與人通姦雖未
成姦取問明白就令婦人離異歸宗
若婦女誣告亦依律罪之如此則凶

徒不得肆姦而良善庶免污辱矣

一件囚人納紙事照得法司見行事例
除真犯死罪竊盜并逃軍逃匠逃囚
不納紙劄外其餘一應罪囚各納紙
一分入官切詳立法初意蓋爲逃軍
逃匠逃囚多是窮苦小人以此免其
納紙今照報効義勇民壯舍餘勇士
力士人等名雖與軍不同其實與軍
一般操備征進爲事一般照例發遣

守哨法司因見前例不曾除豁亦令
納紙未免破費盤纏實是窮苦不堪
及有一家同居人口被人牽告三兩
口在官者有之五七口者亦有之發
落之時每人各納紙一分且民紙一
分值銀三四錢官吏紙一分值銀一
兩富貴者固不爲事貧難者從何措
辦甚至傾財破產鬻男賣女若此窮
苦實可矜憐如蒙

准言乞

勅三法司計議合無將今後問擬在逃報効義
勇民壯舍餘勇士力士人等俱照逃
軍事例免其納紙及一家同居人口
有犯不分人數多少只令納紙一分
如此則窮苦小人不致失所矣
一件囚徒會

赦事伏覩景泰三年五月初二日

詔書內一款官吏軍民人等爲事問發運米做

工等項悉行放免欽此該衙門因見

詔書不曾開有煎鹽炒鐵充軍伴儀從膳夫之類止將運米做工等項放免却將煎鹽炒鐵之類仍前拘役切詳運米做工與煎鹽炒鐵等項囚徒俱係犯該徒流并雜犯死罪人數止是一時發落有此頭項不一矧

詔書明開運米做工等項竊恐煎鹽炒鐵之類亦在其中若止將運米做工囚徒放免其餘煎鹽炒鐵等項不行放免非惟有違

詔書事意且使囚徒不得均霑曠蕩之

恩况煎鹽炒鐵等項多是窮苦軍民在工日久未免逃躲及至挨挈又不出官工役處所既不得其出力原籍原衛又不得伊當差兩相擔閣俱不得用徒有虛名實未便益如蒙

准言乞

勅三法司計議合無將曾經

赦煎鹽炒鐵克儀從膳夫等項囚徒悉與運米

做工等項一體放免如此則

赦例無彼此之分囚徒霑均一之

恩矣

一件除姦革弊事切照在京五府并各
衛軍職官員俸糧折支銀絹椒木等
物每季俱係各衙門差委指揮千百
戶等官赴

內府總領出外分散中間有等無知委官不
以錢糧爲重惟務貪圖肥己多方侵
漁畧無忌憚有指以置買什物而侵
欺者有假以抵還私債而尅落者或
見彼軟弱而全不給與或因人不在
而就不送還宿弊百端難以枚舉及
至事發到官依法追問却乃展轉支
吾不服招認錢糧被其侵欺官府被
其攪擾蓋緣給散之際無有文職糾

察得以縱意自由故也照得年例賞賜軍士冬衣布花俱差給事中御史并戶兵部官親臨該衛眼同委官逐一唱名給散以此委官無由侵欺軍旗受其實惠弊源旣塞詞訟自息此法最善實爲便益如蒙

准言乞

勅該衙門計議合無今後每季關領軍職折俸銀絹椒木之時照舊各差委官赴

內府關領到衛仍照給散冬衣布花事例差給事中御史并戶兵部官分投督令委官將銀兩照數分鑿成塊絹疋每分細作一束椒木每分包作一處如法封記眼同委官逐一唱名給散如此則侵欺之弊可革而告訐之風自息矣

一件僧道犯罪事伏覩

大明律內一款僧道犯罪曾經決罰者並今還

俗欽此切照法司日逐問過僧道但犯一應大小罪名不分故失并曾否決罰悉令還俗其僧道官有犯因見律不該載止照常例運糧運灰等項發落仍令還職臣惟僧道官主典教門表率叢林比之僧道戒行尤宜精嚴持身尤宜端謹僧道有犯既令還俗僧道官有犯豈可仍令還職且人誰能無過若將過誤犯罪及因人連累致罪

并犯罪不曾決罰僧道一槩令其還俗竊恐禁網太密下無全人如蒙

准言乞

勅該部同三法司計議除已發落外合無將今後僧道官并僧道有犯公罪并過誤犯罪及因人連累致罪者俱照常例運糧運灰等項發落仍令還職復業其犯姦盜詐偽并一應故犯罪名俱照常例運糧運灰決罰等項發落不

分僧道官與僧道一體罷職還俗如此則事例得適中之宜僧道少故犯之徒矣景泰五年九月初三日題奉聖旨三法司計議停當行

撫治荆襄

處置地方奏狀

先准兵部咨該本部奏

准行令臣等候賊寇搜勦盡絕之日就行會議區畫久長安治良策差人奏請定奪除款

遵外臣會同監督軍務太監唐慎右少監林貴提督軍務工部尚書白圭總兵官撫寧伯朱永左叅將都督同知喜信右叅將都督僉事鮑政等議得荆襄一帶山林深險土地肥饒刀耕火種易於收穫各處流民僧道人等往往逃移其中用強結菴立產官吏不敢科徵里甲不敢差遣以致驕慢日生縱橫日熾荼毒生靈以天命爲不足畏謀爲不軌以

國法爲不足遵茲者仰賴

皇上聖德神威賊寇俱已殄滅若不乘時處置抑恐餘蔓復滋重貽後患緣係該部奏

准行令臣等會議區畫久長安治良策奏

請定奪事理未敢擅便今將處置地方緣由逐一開坐具本順差指揮同知石湧親齎謹

題請

旨

一襄陽荊州三衛并夷陵千戶所官軍

永樂宣德年間俱在本處操守地方彼時山中雖有流民畏懼軍衛不敢嘯聚爲非正統十四年爲因摘調鎮遠靖州等衛官軍前去麓川雲南等處征進致令邊城缺守苗賊出沒該總督軍務都御史王來等奏

准暫將荆襄等衛官軍調去彼處分作兩班輪流備禦候邊衛清勾軍士足伍之日另行定奪隨後又將三班軍餘亦調

前去征進今已十五六年邊衛隊伍
計必完足前項官軍仍舊輪班一向
本處城池空虛武備廢弛以致賊首
千斤劉等得以伺隙爲非今雖殄滅
勞費實多看得前項衛所除運糧并
頭班備禦官軍外其二班三班官軍
餘丁每衛不過七八百名合無令頭
班官軍照舊前去備禦將二班三班
官軍餘丁存留本處操守城池振揚

威武遇有警急易於調用如此則盜
賊知所畏懼而地方可以永寧矣

一襄陽府房縣僻在萬山之中離府八
日之程所轄地方有歇馬大市螃蟹
溪格兜坡潭頭坪馬腦關三扒峪梯
兒崖頭沙河湯家河洞庭廟玉女廟
長口榔口馬欄青峯壽陽栢木前坪
後坪洪坪等處土地肥饒道路險阻
各處流移人戶在彼潛住者不下萬

數近者賊首千斤劉等一起衆皆響
應相從爲非查得比先年間因見本
縣山水險惡流民數多盜賊不時生
發所以設立一千戶所在彼守禦後
因節將官軍餘丁差調各邊備禦征
進并漕運去訖止留老弱殘疾之人
不堪防禦致賊窺伺爲患且前項地
方溪水雖多灘浪峻急舟楫不通漕
運艱難合無將本所原調各邊備禦

征進并運糧官軍盡數掣回本所操
守城池振揚軍威遇賊生發易爲調
遣撲滅其該所原發運糧官軍宜從
巡撫三司等官計議於各衛另行照
數撥補如此則城池有人操守而緩
急不致悞事矣

一襄陽府均州地里當四方之中與竹
山房縣上津鄖縣穀城光化相爲唇
齒本州地方流民比竹山房縣等處

流民不相上下彼有警則此戒嚴此
缺守則彼驚擾自然之勢無足恠者
本州原設一千戶所官軍一以守禦
本處地方一以控制附近縣分永樂
年間奉

勅全存修理官觀一應備邊征進軍糧等項俱
不差調切緣太嶽太和山宮觀在前
用工修蓋完固卽今煥然如新中間
縱有損壞用工不多查得本所實有

食糧正軍一千二百餘員名餘丁三
千餘名雖稱有輪班修理之名其實
歇役在閑不曾做工合無將正軍盡
數令其在城日逐操練振揚軍威遇
有本處并隣近縣分賊盜生發聽分
巡分守等官調度勦捕各處并邊方
有警及運糧等項不許一槩差調其
餘丁三千餘名照舊輪班修理遇有
大營造之時仍令正軍盡數用工如

此非惟可以保障一方軍民亦可以
防護各山宮觀矣

一襄陽府均州南漳穀城竹山鄖縣上
津房縣等處荊州府當陽遠安等處
俱有各處流移人戶并逃軍逃囚人
等帶領家小在彼耕種趁食躲住逃
年結構爲非均房二處各有千戶所
守禦鄖縣上津竹山三處俱離均房
二千戶所不遠穀城南漳離襄陽衛

不遠當陽離夷陵千戶所不遠惟遠
安縣西北抵房縣千戶所五百餘里
西南抵夷陵千戶所二百八十里東
南抵荊州三衛三百四十餘里又離
荊門南漳當陽等州縣俱各寫遠况
本縣止有一里半民遇有賊盜生發
急無官軍救援照得已革去荊州護
衛官軍見在荊州三衛帶管合無於
內查屯田近遠安者摘調一千戶所

發去遠安縣與民相兼用工修築城池設立千戶所衙門守禦地方如全所不穀一千戶所就於別所轉撥遇賊生發隨即撲捕如此則軍威彼此相接而盜賊不敢輕動矣

一襄陽府房縣南漳穀城襄陽四縣荆州府當陽縣地方接連陝西四川河南疆域廣闊道路險阻要害去處因無巡司盤詰以此各處流移人戶逃

軍逃囚僧道人等往往來彼或開山耕種或結庵居住停藏年久聚集為非看得房縣板橋山穀城縣石花街南漳縣七里頭襄陽縣油枋灘當陽縣漳河口俱係強賊出沒流民經行緊關去處合無前項地方每處設立一巡檢司照例銓官撥吏就於該縣僉點弓兵一百名令其常川盤詰往來巡視除住種年久附籍已定流民

聽其本分生理外其不肯附籍者發
回原籍當差造作非爲者挈送官司
治罪私自結庵僧道就將庵舍拆毀
有度牒者遞送原出家寺院識認住
坐無度牒者解發本管官司問罪還
俗遇有賊盜生發就便相機撲滅仍
仰嚴加禁約今後各處趁食流民僧
道一應無文引之人俱不許擅入前
項山場巡司官兵人等敢有假公營

私生事害人者許巡按御史并按察
司分巡官拏問如律如此則控制有
人而流移不復聚衆關防嚴謹而賊
盜日漸消沮矣

一襄陽府均州竹山鄖縣上津南漳穀
城棗陽光化宜城荊州府當陽遠安
等州縣在前因是土民不及里數俱
係裁減衙門州設知州判官吏目縣
設知縣典史切照各州縣土民雖少

而地土廣闊中間趨食流民屯田軍
餘與土民叅雜住種者不計其數詞
訟日逐紛紜盜賊不時生發原設官
員俱全尚且分理不周一遇公差考
滿等項輒委雜職官員署事非惟不
能幹辦公務抑且因而侵漁百姓以
致事多耽悞民多受害合無將前項
裁減州縣州添設同知一員縣添設
縣丞一員令其專一撫安人民緝捕

盜賊防革奸弊如此不惟撫捕二事
責有所歸而一應公務舉無所失矣
成化二年十月初十日具題奉

聖旨俱准行

查勘失機官員功罪奏狀

准兵部咨該

欽差都察院右副都御史王 題先准兵部咨

該

襄王奏成化元年九月初八日臣爲封內房

縣賊人殺傷差去勦捕軍人攻犯本縣城池已差百戶胡榮具奏其後強賊縱橫自房縣至南漳數百里內放火劫掠殺傷軍民搶去盔甲火藥等器攻陷南漳燒毀縣內居民房屋官吏人民驚惶奔走深被其害等因具奏該本部官於

奉天門欽奉

聖旨前日王奏賊情已勅湖廣總兵等官調兵勦捕今又奏賊情緊急武備多缺且將荆襄

安六五衛運糧官軍存留本處操守殺賊還寫書報王該部知道欽此欽遵抄出送司案呈到部看得

襄王所奏除已欽遵

聖斷施行外照得湖廣都布按三司等衙門怠慢悞事都指揮王英叅議劉子鍾僉事郁文博并知府于璠指揮孫能千戶曹宗李俊李全百戶曹政韓忠尹釗等雖該本部先已議奏行令都御史王 查勘明白叅

奏究治緣今既因各官互相怠慢致賊如此若不另爲處置誠恐各官無所畏懼因而愈加悞事未便合無行移都御史王着令各官住俸做爲事官上緊協力殺賊候前賊勦捕畢日將各官前項悞事實跡并有無殺賊功勤緣由通行查勘明白具奏定奪等因具題成化元年十月二十日本部尚書王復等於

奉天門奏奉